



Inatsisartut Ombudsmandiata 2019-imut ukiumoortumik nalunaarutaata Inatsisartunit tusaatissatut tiguneqarnissaanik Inatsisartut aalajangiiffigisassaattut siunnersuut.

(Inatsisinut ataatsimiititaliaq)

(Siullermeerneqarnera aappassaaneerneqarneralu)

Demokraatit Inatsisartut Ombudsmandiat 2019-imi naammassisaanut qutsavigerusuppaat. Ombudsmandeqarfik naalakkersueqataanitsinnut peqataalluinnartutut isigaarput, pingaartutullu isigalugu, innuttaasut naammagittaalliornissaminnut periarfissaqarnerat.

Ombudsmandeqarfik innuttaasut qaqugukkulluunniit inatsisitigut isumannaatsuunerannut qularnaveeqqutitut isigaarput aammalu oqartussat suliassanik inerniliisarnerannut.

Soorunami perusukkaluaqaarput, sapinngisamik ikinnerpaanik naammagittaaliortoqartarnissaa, tassunga ersiutaassamat pisortani sulinerup eqqortumik ingerlaneramik. Ajoraluartumilli nassuerutigisariaqarparput, naammagittaalliuutit amerligaluttuinnarnerat. Ajoraluartumillu taakkununga ersiutaavoq, kommunini sulineq ilaatigut arriippallaarlunilu amigarpallaartoq. Ajornartorsiut taanna oqaaseqarfigalugulu iliuuseqarfigisariaqarparput.

Pitsaanngilaq, suliarpassuit suliarinerlunneqarsimanerat. Tassunga atasumik Demokraatit aaliangersimasumik oqaatigerusuppaat, pitsaanngilluinnartutut isigigatsigu, kommunit arlaleriarlutik Ombudsmandip saaffiginnissutaanut akissuteqartarsimanninnerat, kingornagut Ombudsmandi akissutissamik tuavisaarisariaqartarsimalluni. Kommunit paasisariaqarpaat, Ombudsmandi innuttaasut sinnerlugit pingaartorujussuarmik demokratiip aqqani suliaqarmat, taamaattumillu, saaffiginnissutit piaarnerpaamik akineqartarnissaat pingaartittariaqaraat.

Tamanna tunngavigalugu Demokraatit kommunit sakkortuumik kajumissaarpaat pitsanngorsaaqqullugit, tamanna aamma suliat suliarineqarnerannut piffissamut sivikillisaataassamat.

Naggataatigut Demokraatit Ombudsmandeqarfimmiut innuttaasut sinnerlugit suliarujussuannut qutsavigerusuppai.

Taamatut oqaaseqateqarluta Ombudsmandip 2019-imut nalunaarutaa tusaatissatut tiguarput.